



Namminersorneq pillugu Inatsimmi § 21-p atuutsilersinneqarnissaa siunertaralugu ataatsimiititaliamik pilersitsisoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Kuno Fencker, Siumut)

(Siullermeerneqarnera)

Inatsisartunut qinersinissamut atatillugu Naalagaaffinngornissaq pillugu isumasiuilluni innuttaasut taasitinneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C Jerimiassen, Atassut)

(Siullermeerneqarnera)

Qujanaq inatsisartunut ilaasortat Kuno Fencker aamma Aqqalu C Jerimiassen siunnersuutissinnut, namminiilivinnissamut tamarmik tunngassuteqartunut.

Demokraatini qularutiginnigilluinnarparput, uagut Kalaallit Nunaanni arlaanni namminerisamik naalagaaffinngorumaartugut. Ullut tamaasa aningaasaqarnikkut, isumaginninnikkut politikikkullu toqqammavissanik suliaqarpugut, tamanna piniassammat. Uani qinersivimmi oqallinneq pingaarutilik aallartissimavarput Danmarkimut, inatsisitigut, politikikkut aammalu aningaasatigut suut naatsorsuutigisinnaanerigut, namminiilivinnermik kissaateqarnek piviusungortinneqassappat.

Isumaqartuarpugut, isummersoqatigiinneq taanna pingaartuusoq, silatunerulersissammatigut, qanorilorutta namminiilivinnissamut aammalu namminiilivinnissaq qanoq akeqassanersoq. Uagutsinnut pingaartuuvoq, maani nunatsinni innuttaasut ilisimassagaat kingunerisinnaasai, siunissami namminiilivinnissamut taasitinneqarnerminni qanoq isummernissaannut.

Siunnersuutit tamaasa marluk iluaraagut. Tullerriiarinerli uagutsinnut pingaartuuvoq. Innuttaasut ilisimassavaat, suna taasisutiginerlugu, taamaattumillu isumaqanngilagut, maanngangaaq tunngaviusumik taasisitsisoqarnissaa. Paasilluaqqaartariaqarparput inatsisitigut, politikikkut aningaasatigullu kingunissai, aalajangeqqaartariaqarlutalu, naalagaaffinngornissaq qanoq ittoq kissaatiginerlugu, innuttaasunut isummertitsisussaq.

Oqanngilangali, naalagaaffinngornissaq pillugu isumasiuilluni innuttaasut taasitinneqarnissaat soorlu Inatsisartunut ilaasortap Aqqalu C Jerimiassenip siunnersuutaatut, kissaatiginnigikkipput.

Kissaatigiinnarparpulli, taasisitsinissaq utaqqinneqassasoq, paasilluaqqaareerutsigu, sunarpiaq taasisissutigissallugu.

Namminiilivinnissamut ataatsimiititaliarsuarmik pilersitsisoqarnissaanut Inatsisartunut ilaasortamit Kuno



Fencker-imit siunnersuutigineqartumut, isumaqataavugut. Kissaatigaarpulli, ataatsimiisitaliarsuaq immikkut ilisimasalinnik ilaasortaqaassasoq, taamaasiornikkut, siullermik politikikkut akuliuffigineqarani ingerlanneqassamat. Uagut politikkerit soorunami ataatsimiititaliarsuup suliai isummerfigissavagut, aammalu pisariaqassagunarpoq politikikkut arlaatigut malittarinnittussamik pilersitsinissaq. Tassunga atatillugu Tunngaviusumik inatsisissaq pillugu isumalioqatigiissitami misilittakkagut ilinniutisariaqarpagut, ersarissumik kinguneqarmat, isumalioqatigiissitami politikkerinik akuuffigineqartoq arriillunilu sunniuteqarsimannginneri. Taassuma nangeqqinnissaa kissaatiginngilarput.

Isumalioqatigiissitaq eqaatsumik sukkasuumillu suleriesilik kissaatigaarput, siunissami isikkorisinnaasaanik taakkartuisinnaasoq, taassuma kinguneranik politikikkut isummerfigisinnaasatsinnik. Aamma kissaatigaarput, isumalioqatigiissitap piviusorpalaartunik siunissami isikkorisinnaasaata kingunissaanik naatsorsuutinik tunniussinissaa, tassunga politikikkut isummersinnaaniassagatta ersarilluinnartumik toqqammaveqarluta.

Taamatut oqaaseqaateqarluta siunnersuutit tamarmik marluk ataatsimiititaliami susassaqartumi suliareqqinneqarnissaat innersuussutigaarput.